



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu: 2011

Edisaun: 17 Outubru 2011

**Ministériu Públiku kondena arguidu ba Kazu Omisídiu Agravadu
tinan 15 iha Prizaun**

Iha lora 11 fulan Outubru 2011, Tribunál Distritál Dili hala'o audiénsia julgamentu hodi rona depoimentos husi testamuña ba kazu omisídiu agravadu hasoru idozus.

Kazu ne'e akontese iha Suco Mascarenhas, Sub Distritu Cristo Rei, Distritu Dili, iha lora 15 Maiu 2011. Kazu refere rejistadu iha tribunál ho Nú. Prosesu 343/C.Ord/2011 TDD ne'ebé komete husi arguidu inisial MDC hasoru vítima Luçiana Martins (matebian).

Antes akontesementu ne'e arguidu nu'udar elementu militar iha Forsa Armada F-FDTL, maibe komando F-FDTL demite ona arguidu tanbá kazu ne'ebé nia involve.

Julgamentu ba kazu ida ne'e prezide husi juizes kolektivu hanesan Dr. Costançio Basmery (Juiz Presidente), no akompaña husi Dra. Jacinta Correia (Juiz Adjuntu) no Dr. Alvaro Freitas (Juiz Adjuntu). Entertantu husi parte Ministériu Públiku, representa husi Dr. Reinato Bere Nahac no arguidu rasik hetan asisténsia legál husi Dr. Wilson D. Pereira Cabral nu'udár Advogadu Privadu.

Diretór ezekutivu JSMP, Luis de Olivera Sampaio, haktuir katak; “ aktu krime ne'ebé komete husi arguidu hasoru vítima ho idade idozus, nu'udar krime omisídiu argavadu tanbá ne'e husu ba tribunál kompetente hodi hamonu pena ne'ebé justu bazeia ba gravidade krime ne'ebé arguidu komete.”

Nu'udar elementu militar tuir loloos tenki sai hanesan lutu ba nasaun hodi proteze kualker amiasa hasoru sidadaun sira la'os` sai fali amiasa ba sidadaun sira hodi halo tortura hasoru ema idozu to'o mate.

Tuir testamuña ho inisial LC ne'ebé iha tempu akontesimentu hamutuk ho arguidu deklarata katak, iha lora 15 Maiu 2011 mais ou menus oras tuku 15:00 lora kraik sira

hemu hamutuk tua butir 4 no serveja ABC lata 3. Wainhira arguidu ho kolega seluk sei hemu, testamuña LC ba vizita katuas ida ho inisial FM iha uma sorin. La kleur hafoin arguidu mos tuir ba no haree LC tanis, arguidu husu dehan tanba sa mak tanis, LC dehan triste tanba haree katuas ne'e nia moras. Arguidu husu LC se katuas hakarak nia bele kura katuas, arguidu dehan katuas nia moras ne'e ema mak halo, bainhira sei ko'alia vitima mosu no lori hela hudi atu han. Tanba deskonfia vitima no arguidu duun vitima mak halo katuas ne'e moras tanba deskonfia katak vitima kaer aimorok aat (buan) depois arguidu basa no rasta vitima nia fuk hodi obriga vitima fo ai moruk diak ba katuas FM.

Liu tan LC depoimenta katak, tanba la tahan haree arguidu baku no obriga vitima depois LC desmaia (lakon konsensia) no monu la hatene saida mak akontese tan. Bainhira LC hader, kareta ambulance lori vitima ba tiha ona ospital no depois arguidu rasik husu ajuda atu ba haree vitima iha ospital no sira haree katak kondisaun vitima latan hela iha kama leten no too ikus vitima mate.

Tuir testamuña ho inisial JC, BDC, JXA, GGG no EDC ne'ebe iha tempu akontesimentu haree ho matan deklarata katak, arguidu; basa, tuku, tebe dala barak no baku ho kanuru rai henek depois lees vitima nia ropa no loke vitima nia kelen hodi hatudu ba publiku katak buan nia sasan lulik mak hanesan ne'e. Arguidu mos hatama no hasai vitima ba be posu laran, no iha momentu ne'eba vitima hakilar dehan *na'i hau sala saida*, maibe arguidu nafatin baku vitima.

Relasiona ho faktu hirak ne'e, iha Ministriu Publiku ninia alegasaun final haktuir katak, bazeia ba depoimentu testamuña sira iha leten, no liga ba akuzasaun, Ministriu Publiku mantein nafatin ninia akuzasaun ba arguidu ne'ebe komete krime omisidui agravadu hasoru vitima ne'ebe mak tama ona kategoria idozus ona.

Pozisaun Ministriu Publiku ne'e bazeia ba Artigu 139 (h) Kodigu Penal Timor Leste ne'ebe defini katak "*vitima ema vulneravel tebes tanba nia idade, moras ka defisiensia fizika ka psikika*". Bazeia ba artigu refere Ministriu Publiku husu Tribunál fo kastigu ba arguidu tinan 15 prizaun.

Relasiona ho faktu no karakter kazu ne'ebe akontese no arguidu ne'ebe antes ne'e, nu'udar elementu militar ativu, tuir JSMP nian hanoin katak krime ne'ebe arguidu komete la'os deit krime omisidui agravadu ne'ebe akontese bai-bain, maibe nu'udar krime kontra humanidade, tanba arguidu ema nu'udar militar, nia uja nia forsa hodi halo intimidasaun ho maneira tuku, tebe, hasai vitima nia ropa no husu vitima hakne'ak ba ema seluk ho livremente.

Tanba ne'e, JSMP husu ba tribunál atu konsidera faktu hirak ne'e hodi fo justisa ne'ebe justu ba familia vitima no hametin ba ema hotu ne'ebe sente prekupadu ho akontementu ne'e.

Tribunál marka fali data audiensia hodi lee leitura akordaun ba kazu refere ba loron 26 Outubru 2011, oras tuku 14.30 lorokraik.

Atu hetan informasaun kle'an, favor kontaktu:

Luis de Oliveria Sampaio
Diretór Ezekutivu JSMP
Email: luis@jsmp.minihub.org
Landline: +670 3323883